

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona na 149. sjednici održanoj dana 12.02.2014. godine d o n o s i

ZAKLJUČAK

I.

Utvrđuje se prijedlog Odluke o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona.

II.

Prijedlog Odluke iz tačke I. ovog zaključka kao i Elaborat o društveno-ekonomskoj opravdanosti osnivanja i načinu funkcionisanja postojećih Dневnih centara za djecu i odrasle osobe s posebnim potrebama u Zeničko-dobojskom kantonu, kao edukacijsko-rehabilitacijske ustanove, upućuje se u skupštinsku proceduru.

III.

Zaključak stupa na snagu danom donošenja.

Broj: 02-_____/14.

Datum, 12.02.2014. godine

Z e n i c a

PREMIJER

Munib Husejnagić, dipl.ing.maš.

DOSTAVLJENO:

1x Ministarstvo za rad, socijalnu politiku i izbjeglice,

1x Stručna služba Skupštine,

1x a/a.

Na osnovu člana 37. stav (1) tačka f) Ustava Zeničko-dobojskog kantona, u vezi sa članom 6. Zakona o ustanovama („Sl. list R BiH“, broj: 6/92, 8/93 i 13/94) i članom 73. stav (5) tačka b) alineja 3) i tačka e) Zakona o socijalnoj zaštiti, zaštiti civilnih žrtava rata i zaštiti porodice sa djecom („Sl. novine Zeničko-dobojskog kantona“, br. 13/07 i 13/11), Skupština Zeničko-dobojskog kantona na __ sjednici održanoj dana __.__.2014. godine, d o n o s i

O D L U K U

O OSNIVANJU JAVNE USTANOVE CENTAR ZA DJECU I ODRASLE OSOBE S POSEBNIM POTREBAMA ZENIČKO-DOBOJSKOG KANTONA

DIO PRVI - OPĆE ODREDBE

Član 1. (Predmet)

Ovom odlukom Skupština Zeničko-dobojskog kantona osniva Javnu ustanovu Centar za djecu i odrasle osobe s posebnim potrebama Zeničko-dobojskog kantona (u daljem tekstu: Centar).

Član 2. (Sadržaj osnivačkog akta)

Odlukom o osnivanju Centra uređuje se:

- a) naziv osnivača,
- b) naziv i sjedište ustanove,
- c) djelatnost,
- d) sredstva za osnivanje i početak rada ustanove,
- e) međusobna prava i obaveze između osnivača i ustanove,
- f) prava, obaveze i odgovornost u pravnom prometu,
- g) imenovanje organa upravljanja, rukovođenja i kontrole poslovanja,
- h) rok za donošenje statuta,
- i) druga pitanja od značaja za rad ustanove.

DIO DRUGI – NAZIV I SJEDIŠTE

Član 3. (Naziv javne ustanove)

(1) Javna ustanova posluje pod nazivom Centar za djecu i odrasle osobe s posebnim potrebama Zeničko-dobojskog kantona.

(2) Skraćeni naziv Javne ustanove je: Centar za osobe s posebnim potrebama.

Član 4.
(Sjedište)

Sjedište Centra je u Zenici, u ulici Saliha Cakana Mulalića br. 5.

Član 5.
(Pravni status)

- (1) Centar stiče svojstvo pravnog lica danom upisa u sudski registar.
- (2) Centar ima pečat i štambilj čiji se oblik i sadržina utvrđuju Statutom Javne ustanove.
- (3) Centar može imati poslovne jedinice koje će biti osnovane s ciljem obavljanja registrovane djelatnosti Centra na području Zeničko – dobojskog kantona.
- (4) Odluku o osnivanju poslovnih jedinica Centra donosi Upravni odbor Centra uz saglasnost Vlade Zeničko – dobojskog kantona i Udruženja Humanost-societas humanitatis Zenica.

DIO TREĆI – OSNIVAČ, DJELATNOST I CILJEVI

Član 6.
(Osnivač)

Osnivač Centra je Zeničko-dobojski kanton (u daljem tekstu: Osnivač).

Član 7.
(Djelatnost)

- (1) Djelatnost Centra prema Odluci o klasifikaciji djelatnosti Bosne i Hercegovine („Sl.glasnik BiH“, broj 47/10), je:
- 88.91 – djelatnost dnevne brige o djeci,
 - 88.99 – ostale djelatnosti socijalne zaštite bez smještaja,
 - 88.10 – djelatnosti socijalne zaštite bez smještaja za starije osobe i osobe sa invaliditetom,
 - 86.90 – ostale djelatnosti zdravstvene zaštite,
 - 85.59 – ostalo obrazovanje i poučavanje
 - 87.90 – ostale djelatnosti socijalne zaštite u ustanovama sa smještajem.

Član 8.
(Ciljevi i zadaci)

Ciljevi i zadaci radi kojih se osniva Centar su:

- odgoj i obrazovanje djece i mladih osoba sa posebnim potrebama sa područja općina Zeničko – dobojskog kantona s ciljem izgradnje ličnog identiteta, socijalne integracije, izgradnje kompetencija od životnog značaja, pripreme za život nakon škole, a prema prilagođenom nastavnom planu i programu,
- (re)habilitacija i podsticaj djece i mladih osoba sa posebnim potrebama kroz individualne i grupne rehabilitacijske i podsticajne mjere,
- dnevno zbrinjavanje djece i odraslih osoba sa posebnim potrebama,
- radno osposobljavanje i rehabilitacija odraslih osoba sa posebnim potrebama sa područja općina Kantona.

DIO ČETVRTI- SREDSTVA

Član 9. (Sredstva za osnivanje i rad)

(1) Osnovni kapital Centra u visini od 49.250,00KM (četrdesetdevet hiljada dvjesto pedeset KM) osigurat će se iz Budžeta Zeničko-dobojskog kantona.

(2) Sredstva za rad Centra obezbjeđuju se iz budžeta Osnivača i po osnovu ugovora sa općinama o učešću u pokriću dijela ili ukupnih troškova usluga Centra, te drugih izvora.

Član 10. (Raspodaganje prihodima i rashodima)

Višak prihoda nad rashodima Centra, uz saglasnost Osnivača, koristi se za obavljanje i razvoj djelatnosti zbog koje je osnovan.

DIO PETI – PRAVA, OBAVEZE I ODGOVORNOSTI U PRAVNOM PROMETU

Član 11. (Odgovornost za obaveze)

(1) U pravnom prometu sa trećim licem Centar zaključuje ugovore i vrši druge pravne poslove u okviru registrovane djelatnosti.

(2) Za preuzete obaveze u pravnom prometu Centar odgovara imovinom kojom raspolaže.

(3) Osnivač je supsidijarno odgovoran za obaveze Centra, koje su nastale kao rezultat rada u okviru registrovane djelatnosti.

DIO ŠESTI – ORGANI I OPĆI AKTI JAVNE USTANOVE

Član 12. (Organi)

Organi Centra su:

1. Upravni odbor,
2. Nadzorni odbor i
3. Direktor.

Član 13. (Upravljanje)

(1) Organ upravljanja Centra je Upravni odbor.

(2) Upravni odbor ima pet članova i čine ga predstavnici osnivača – dva člana, predstavnici zaposlenih Centra - jedan član, dok se dva člana biraju sa liste ostalih prijavljenih kandidata na javni oglas.

(3) Predsjednika i članove upravnog odbora imenuje Vlada Zeničko-dobojskog kantona (u daljem tekstu: Vlada) na period od četiri (4) godine i mogu biti ponovo imenovani.

Član 14. (Djelokrug rada)

Upravni odbor donosi Statut Centra, imenuje i razrješava direktora uz saglasnost Vlade, utvrđuje planove rada i razvoja, utvrđuje godišnji program rada, donosi finansijski plan i usvaja godišnji obračun, donosi opći akt o unutrašnjoj organizaciji i sistematizaciji poslova i druge opće akte u skladu sa zakonom i Statutom Centra, odlučuje o svim pitanjima obavljanja djelatnosti radi kojih je javna ustanova osnovana, usmjerava, kontroliše i ocjenjuje rad direktora, rješava sva pitanja odnosa sa osnivačem, odlučuje o korištenju sredstava preko iznosa utvrđenog pravilima javne ustanove, osnivaču najmanje jedanput godišnje podnosi izvještaj o poslovanju Centra, vrši i druge poslove, u skladu sa zakonom i Statutom Centra.

Član 15. (Kontrola poslovanja)

- (1) Organ kontrole poslovanja Centra je Nadzorni odbor.
- (2) Nadzorni odbor ima tri člana, od kojih se jedan imenuje iz reda zaposlenih, dok se preostali članovi biraju sa liste ostalih prijavljenih kandidata na javni oglas.
- (3) Predsjednika i članove Nadzornog odbora imenuje Vlada.
- (4) Nadzorni odbor obavlja poslove i zadatke u skladu sa zakonom i Statutom Centra.

Član 16. (Rukovođenje)

- (1) Direktor je organ rukovođenja Centra.
- (2) Centar predstavlja i zastupa direktor bez ograničenja ovlaštenja, a u okviru registrovane djelatnosti i u skladu sa zakonom i Statutom Centra
- (3) Direktora Centra imenuje Upravni odbor na osnovu javnog konkursa, uz saglasnost Vlade na period od četiri (4) godine i može biti ponovo imenovan.
- (4) Direktor obavlja poslove i zadatke u skladu sa zakonom i Statutom Centra.

Član 17. (Statut)

(1) Osnovni opći akt Centra je Statut, a ustanova može imati i druge opće akte u skladu sa zakonom i Statutom.

(2) Statut Centra sadrži odredbe o: nazivu i sjedištu ustanove i poslovnih jedinica (ako budu osnovane), obavezama ustanove prema Osnivaču, djelatnosti ustanove i o načinu i uslovima obavljanja te djelatnosti, odnosu prema korisnicima usluga, statusnim promjenama, načinu raspoređivanja sredstava za rad, imenovanju i razrješavanju direktora, drugim organima ustanove i njihovim pravima, obavezama i odgovornostima, uslovima i načinu njihovog izbora i razrješavanja, općim aktima koji se donose u ustanovi i načinu njihovog donošenja, načinu ostvarivanja javnosti rada, drugim pitanjima utvrđenim zakonom i druge odredbe od značaja za rad ustanove i za ostvarivanje prava, obaveza i odgovornosti zaposlenika ustanove.

DIO SEDMI – PRIJELAZNE I ZAVRŠNE ODREDBE

Član 18.

(Privremeno imenovanje upravnog odbora i direktora)

Vlada Kantona će u roku od 15 (petnaest) dana od dana stupanja na snagu ove odluke imenovati upravni odbor, vršioca dužnosti direktora Centra na kraći period utvrđen zakonom, a najduže do konačnog imenovanja na ove pozicije i donijeti privremeni Statut s ciljem izvršenja propisane procedure upisa subjekta u sudski registar.

Član 19.

(Donošenje statuta)

Upravni odbor iz člana 18. ove odluke će u roku od 30 (trideset) dana od dana donošenja Rješenja o registraciji od strane nadležnog suda donijeti Statut Centra i podnijeti Vladi na saglasnost.

Član 20.

(Upis u sudski registar)

Vršilac dužnosti direktora Centra dužan je preduzeti sve potrebne radnje za upis Centra u sudski registar.

Član 21.

(Stupanje na snagu)

Odluka stupa na snagu narednog dana od dana objavljivanja u “Službenim novinama Zeničko-dobojskog kantona”.

Broj: _____/14
Datum, ___ februar 2014. godine
Z e n i c a

PREDSJEDAVAJUĆI

Sretko Radišić s.r.

Obrazloženje

PRIJEDLOGA ODLUKE O OSNIVANJU JAVNE USTANOVE CENTAR ZA DJECU I ODRASLE OSOBE S POSEBNIM POTREBAMA ZENIČKO-DOBOJSKOG KANTONA

I PRAVNI OSNOV

Ustavni osnov za donošenje ove odluke sadržan je u odredbama člana 37. stav (1) tačka f) Ustava Zeničko-dobojskog kantona, kojim je propisano da Skupština donosi zakone i ostale propise za izvršavanje kantonalnih nadležnosti.

Pravni osnov za donošenje Odluke osnivanju Javnu ustanovu Centar za djecu i odrasle osobe s posebnim potrebama Zeničko-dobojskog kantona (u daljem tekstu: Odluka) sadržan je u odredbama člana 1., 5. i 6. Zakona o ustanovama („Sl. list R BiH“ broj: 6/92, 8/93 i 13/94) Navedenim zakonskim odredbama je propisano da se ustanova osniva za obavljanje djelatnosti socijalne zaštite i drugih djelatnosti u skladu sa zakonom, kao i uslovi za osnivanje i početak rada ustanove. Također pravni osnov za donošenje Odluke sadržan je u odredbi člana 73. stav (5) tačka b) alineja 3) i tačka e) Zakona o socijalnoj zaštiti, zaštiti civilnih žrtava rata i zaštiti porodice sa djecom („Sl. novine Zeničko-dobojskog kantona“, br. 13/07 i 13/11), koji govori o mogućnosti pružanja usluga kojima se u cjelini ili djelimično zadovoljavaju socijalne i druge potrebe djeci ometenoj u fizičkom ili psihičkom razvoju – djeci sa posebnim potrebama, kao i dnevni boravak korisnika socijalne zaštite na način da se osnuje ustanova socijalne zaštite.

II RAZLOZI ZA DONOŠENJE

Vlada Zeničko – dobojskog kantona je na 145. sjednici održanoj dana 23.01.2014. godine donijela Zaključak broj: 02-35-1761/14, kojim je prihvatila Elaborat o društveno – ekonomskoj opravdanosti osnivanja i načinu funkcionisanja postojećih Dневnih centara za djecu i odrasle osobe s posebnim potrebama u Zeničko – dobojskom kantonu, kao edukacijsko-rehabilitacijske ustanove.

Ministarstvo za rad, socijalnu politiku i izbjeglice je u Elaboratu, koji je sastavni dio ovog obrazloženja, je predočilo koji su to razlozi i konkretni koraci koje treba preduzeti kako bi se osiguralo da djeca i odrasle osobe s posebnim potrebama ostvare pravo da im se u najvećoj mogućoj mjeri osigura uključivanje u obrazovni sistem, socijalizaciju i sve druge vidove integracije u društvu.

S ciljem sistemskog uređenja obavljanja djelatnosti socijalne, odgojno-obrazovne i zdravstvene zaštite za djecu i odrasle osobe s posebnim potrebama neophodno je osnivati kantonalnu javnu ustanovu.

Da bi se Javna ustanova osnovala potrebno je u skladu sa Zakonom o ustanovama („Službeni list R BiH“, broj: 6/92, 8/93 i 13/94) provesti propisanu proceduru tj. obezbijediti uslove za osnivanje i početak rada ustanove što podrazumijeva i donošenje osnivačkog akta od strane Skupštine Zeničko-dobojskog kantona.

III OBJAŠNENJE PREDLOŽENIH PRAVNIH RJEŠENJA

U Zeničko – dobojskom kantonu na razvoju zaštite djece i odraslih s posebnim potrebama preduzete su sljedeće aktivnosti:

- Krajem 2006. godine implementiran je projekat „Dnevni centar za djecu s posebnim potrebama Maglaj“ (pilot faza), finansiran iz sredstava njemačke fondacije „Učenici pomažu život“ (SHL), iz budžeta općina Zavidovići, Žepče i Maglaj i Budžeta Zeničko-dobojskog kantona. Od decembra 2011. godine, uz saglasnost Vlade Zeničko – dobojskog kantona, u Maglaju je Udruženje „Humanost-societas

humanitatis“ Zenica osnovalo ustanovu pod istim nazivom „Dnevni centar za djecu s posebnim potrebama Maglaj“ .

- Shvatajući važnost ranog otkrivanja djece s poteškoćama u razvoju Vlada Zeničko-dobojskog kantona je u saradnji sa svim općinama Kantona, nevladinim sektorom, odnosno Udruženjem “Humanost”, uz stručnu pomoć partnera iz inozemstva, 2008. godine započela izgradnju zgrade “Centra za rano podsticanje razvoja i ranu intervenciju za djecu s posebnim potrebama” u Zenici. Imajući na umu da se zadatak Centra može ispuniti samo kroz multidisciplinarni i multisektorski rad, stavljen je naglasak na suradnju institucija i ustanova iz različitih oblasti: zdravstva, predškolskog obrazovanja i odgoja, osnovnog i srednjeg obrazovanja, te socijalnog rada i socijalne zaštite. Centar je počeo sa radom 2009. godine, a i dalje funkcionira na projektnoj osnovi.

- U nastojanju da se usluge dnevnog centra prošire i na ostale općine Zeničko-dobojskog kantona, krajem 2012. godine izgrađena je zgrada „Dnevnog centra za djecu i odrasle osobe s posebnim potrebama“ u Visokom. Projekat su realizirali Ministarstvo, općina Visoko i udruženje „Humanost – societas humanitatis.“ Mogućnost za pružanje usluga za djecu i odrasle osobe s posebnim potrebama proširila se i na općine Kakanj, Visoko, Breza, Vareš i Olovo.

Dakle, u općinama Zenica, Visoko i Maglaj su izgrađeni namjenski objekti za djecu sa teškoćama u razvoju i učenju predškolskog uzrasta i djecu sa riziko faktorom predškolskog uzrasta, odnosno za djecu i odrasle osobe sa posebnim potrebama.

Vlasnici objekata su navedene općine, a za sve objekte je ugovorena obaveza da će biti namjenski i trajno korišteni za pružanje usluga za djecu i odrasle osobe s posebnim potrebama. Kanton i općine su zajednički se obavezale da će se ova obaveza i realizirati.

Naime, imajući u vidu da zaštita djece i odraslih osoba s posebnim potrebama na području Zeničko-dobojskog kantona nije uvezana u jedinstven sistem, da se općini Maglaj zaštita provodi u okviru ustanove, a u općinama: Zenica, Visoko i u dogledno vrijeme Tešanj kao projektna djelatnost, i da se većim dijelom finansira iz Budžeta Zeničko-dobojskog kantona, potrebno je stvoriti polaznu osnovu da se uredi pravni položaj i način jedinstvenog pružanja predmetnih usluga djeci i odraslim osobama s posebnim potrebama na području Zeničko – dobojskog kantona. Zbog navedenog predlažemo Skupštini Zeničko-dobojskog kantona donošenje odluke kao u prijedlogu.

IV FINANSIJSKA SREDSTVA ZA SPROVOĐENJE ZAKONA

Za provođenje ove Odluke potrebna su finansijska sredstva u visini od 49.250,00KM (četrdesetdevet hiljada dvjestopedeset KM), za uplatu osnovnog kapitala javne ustanove, a koja je planirana u Budžeta Zeničko-dobojskog kantona za 2014. godinu, na poziciji Ostala osnivačka ulaganja u ovom Ministarstvu.

Napominjemo da u skladu sa članom 9. Odluke, sredstva za rad Centra obezbjeđuju se iz budžeta Osnivača, po osnovu ugovora o učešću korisnika u pokriću dijela ili ukupnih troškova usluga Centra, te drugih izvora.

U Zenici, februar 2014. godine

**Ministarstvo za rad,
socijalnu politiku i izbjeglice
MINISTAR**

Ivica Ćurić